

**■ COLUMNA**

# «Eba aba»

DA BARBLA ETTER, FRIBURG

**E**ba aba in da Nebel»  
 Va il Gian tenor la reclama da Grischun Vacanzas. Ed el n'è betg sulet. Millis e millis dal chantun Grischun e dad autras regiuns situadas sur la tschajera van giu en quel mund tranteren per lavar, per studegiar u or dad auters motivs. Er jau sun puspè ida giu, giu en quella tschajera che fa la chaja.

**S**ez la culpa, pensais vus  
 forse ussa. E raschun avais. Jau sun ida voluntarain engiu e vers vest. La lavur m'ha clamada giu ed en sasez sun jau fitg cuntenta qua. Sche mo questa tschajera na fiss betg. Ella parta la Svizra en duas classas; quels sura e quels sut. Viver sa lascha quai sur e sut, ma adina guardar or en quel grisch na ma fa betg grond plaschair. Percunter m'allegrel jau e cun mai tut ils auters sut-vart segir bler dapli sche il sulegl rumpa alura finalmain tras la tschajera.



**N**'èsi betg gia lungurus  
 en Grischun cun quest sulegl? Adina sulegl, sulegl, sulegl? Ins na po gea bunamain betg star cun buna conscienza endadens legend in cudesch u guardond furmla 1 la dumeniga. Navaira?

**L**a tschajera ha damai  
 Lera sias varts positivas. E schizunt bellas varts ha ella. Per exempel sch'ins va la fin d'emna en il Giura a far ina spassegiada. Ultimain sun jau ida en la Vallée de Joux ina sonda, sperond che là n'haja quai pli nagina massa grisch. Ma oha, arrivada a Le Pont è era là tut grisch. I na ma resta nagut auter che da chaminar ensi. L'emprim è

la tschajera anc sur il chau, alura vegn ins en en ella e vesa strusch 20 meters. Igl è sco in bogn da vapur fraid, ils chavels èn suent 10 minutas plain prugina ed jau transformada en ina dunna veglia.

**M**a zac! Tutenina han  
 Mins l'impressiun da vegnir en in auter mund. Forsa er in pau in meglier mund. Segir in pli bel. Tut traglisch, il prà plain schelira, sin las plantas è la schelira gia sdregliada a prugina ed ils daguts gli-schan sco millieras da perlas.

**E**cur ch'ins arriva sisum  
 la collina, en quel cas il Mont Tendre, ves'ins giu sin la mar che bitta undas alvas. Lunsch davent vers sid creschan las Alps directamain or da la mar: il Mont Blanc e tut la cumpania. Vers nord vegnan las collinas dal Giura sco inslas or da la mar. Da sur-engiu è ella ina bellezza, questa tschajera. Main bel è da turnar engiu – giu en il mund tranteren – «eba aba in da Nebel».